

Tecnópole

O libro sobre Wimax máis descargado de Internet

Quobis Networks, a firma galega de telecomunicacións especializada na integración de redes con laboratorio técnico na Tecnópole, acaba de facer pública a segunda edición do informe técnico 'WiMAX: a revolución inalámbrica... ¡e móbil!'. A primeira edición acadou 10.000 descargas.

USC

Edición dun vocabulario de Medicina en galego

Facilitar a tarefa de falar e escribir sobre medicina en galego a quen ensina ou se forma é o principal cometido do 'Vocabulario de Medicina' que o Servizo de Normalización Lingüística (SNL) da USC elaborou, coa colaboración da Consellaría de Sanidade, logo de cinco anos de traballo.



Presentación do Vocabulario de Medicina. DP

Vigo

Matemáticas aplicadas á industria na Universidade

A relación entre as matemáticas e a industria centrou o VI Foro de Interacción Matemática Aplicada Industria, organizado polas tres universidades galegas. Unha das misións do evento é «chegar ata esa fronteira do coñecemento aplicado e á súa transferencia», sinalou o reitor Alberto Gago.


EUREKA!

www.eureka.
diariedopontevedra.com

As ciencias aplicadas non existen, só as aplicacións da ciencia. **Louis Pasteur**

Pórtico, a biblioteca dixital galega

► **As universidades** galegas lanzan unha plataforma con acceso simultáneo aos seus recursos de información dende un só portal, que permite ver textos completos, comprobar a dispoñibilidade da versión impresa na biblioteca, xestionar a petición dun exemplar, consultar o factor de impacto dunha publicación ou exportar citas bibliográficas



A plataforma servirá para achegar ós universitarios á información. JAVIER CERVERA-MERCADILLO

SANTIAGO. A comunidade universitaria galega, dende un só portal web, xa dispón dun novo servizo de busca simultánea e recuperación de información, que indaga nos recursos do Consorcio de Bibliotecas Universitarias de Galicia (Bugalicia) combinados cos de cada unha das tres universidades.

A plataforma denomínase Pórtico e xorde froito da cooperación entre os servizos bibliotecarios do Sistema Universitario de Galicia (SUC) máis o Consorcio de Bibliotecas Universitarias de Galicia co financiamento da Dirección Xeral de I+D da Consellaría de Innovación e Industria.

METABUSCADOR | Unha das principais ferramentas da plataforma Pórtico é un metabuscador que lanza consultas sobre os recursos de información electrónica consorciados de Bugalicia ao mesmo tempo que nos propios dispoñibles de cada unha das universidades. Entre eles atópanse revistas, libros, bases de datos, catálogos bibliográficos, teses, patentes, normas, enciclopedias e dicionarios, así como outros moitos en Internet, entre eles prensa electrónica ou boletíns oficiais.

Os recursos de información científica on line contratados por Bugalicia cóntanse a día de hoxe en paquetes editoriais con arredor de 20.500 revistas electrónicas, incluídas as máis prestixiosas; 4.000 e-books, case medio cento de bases de datos con acceso, á súa vez, a milleiros de revistas a texto completo e máis de 10.500 actas de congresos ou estándares.

A plataforma Pórtico proporciona servizos adicionais, como o xestor de enlaces SFX, unha apli-

cación que integra compoñentes da biblioteca dixital mediante unha xeración dinámica de enlaces. Esta ferramenta permite, logo da busca, obter o texto completo sempre que estea dispoñible, comprobar se a biblioteca dispón dunha versión impresa. E fai posible a súa solicitude a través do servizo de préstamo interbibliotecario. A maiores podemos consultar o factor de impacto das revistas consultadas, unha variable que indica a relevancia internacional das publicacións; acceder a táboas de contidos ou resumos ou buscar outros documentos do mesmo autor. Tamén é posible exportar citas bibliográficas das consultas realizadas a Refworks, un sistema moi útil en especial para investigadores, científicos, ou docentes que estean elaborando un artigo para unha revista científica e teñen que cumprir unhas normas moi específicas de citación bibliográfica, que este sistema xa resolve automaticamente.

Todos estes servizos se realizan dentro dun mesmo menú.

A plataforma está concebida para complementar e aportar valor engadido, nunca para substituír, a consulta sobre as plataformas especializadas. É especialmente útil para un achegamento xeralizado á información que nos interesa sobre un área de coñecemento determinada e que podemos atopar entre os recursos do Consorcio e simultaneamente sobre os de cada unha das universidades.

A implantación de Pórtico permite a todas as bibliotecas universitarias de Galicia manterse ao día nas novas tecnoloxías da información para fornecer os servizos bibliotecarios que se prestan a toda a comunidade universitaria.